

Kipindji : 13 Mifubo mu Kakongye na Bafubi

Kisaka kya kabidi kya baaba abatumika mu kakongye kikwanka na bano bantu : balami na bafubi, kishima kya mu kingidiki « **diakonos** » akipatuula kumpala'shi mufubi ; yawa atumika ku mufubo bwa saa ikampanda. Suunga' shi kino kishima bekifunde mu mbifundwe anka akyakulwa mu kingi kipaso bu : mufubo wa kulama nyama, anka pa mwanda wa mifubo imu kakongye. Mbwa kabingilo ka kupushisha kalolo atwata kishima « **Mufubi** ».

Kilshesho kya baaba babaadi bafubi atwikisangana mu mukanda wa Mikitshino 6 :1-6. Mu byabya bishingatshilo, mwi lukonko pa bitale lutato lwa bangi bena kukumiina babaadi abedidi, mwanda'shi bakashi baabo bakamba babaadi abebapungakanya ku bukwashi bwa kwifuku. Bano bantu babaadi bena Yunda babaadi batandjibwe mu senga ya bena Ngindiki babaadi bakumiine ngikashi ya bena Ngindiki, anka bashaalele ku Yelushaleme. Babaadi na ngyelelo a binangu mwilekeene na a bena Ebeleo. Batumiibwe babaatekyele kwi kakongye byabadya kusangula bantu musambobidi (7) bwa kutala nkalo ya bakashi bakamba babaadi mu lutato. Tababaadi abebayitanyina bu bafubi, suunga kwibapa mwasu, anka babaadi na bushito (**mufubo**). Kyakya kitshibilo kibakwashishe batumibwe byabadya kutungunuka na mufubo ukata wa luteko na kupalakasha mukandu wibuwa. Atumono kalolo'shi booso babaadi (**batudibwe**) suunga babaadi basangulwe babaadi na mashina a bena « **Ngindiki** ». Misuusa bungi kini bibaadi abileshe ntumbo y'Efile-Mukulu. Takubaadi dingi mwinuno suunga kwidila kwa baaba bakashi bakamba. Bano bakwetu balume babaadi basangulwe kwi kakongye na tabasangulwe kwi batumibwe bwa wawa mufubo nya, bangi babaadi na bya buuntu bibaadi bibapebwe kwi Fumu. Fidipi baadi mupalakashi a mukandu wi buwa, Etienne namu baadi alambukisha na bukome. Bibamufikishe na ku lufu lwa kwashibwa mabwe.

Atusangana'shi : bano bantu babaadi bakumbashe bitungo bifundwe mu bishingatshilo bi mu mukanda wa Mikitshino 6:1-6:

1. **Bekale bukomoni bwibuwa** : babaadi booso abawukibwa bu bantu balulame, takubaadi bya kutwesha bilubilo nya;
2. **Babaadi bwuule na Kikudi-E-Selele** : Fumu baadi nabo na babaadi bakumbashe mifubo wabo;
3. **Babaadi na bukalabwino** : babaadi na kinangu kya kutundula nkalo na kwata bitshibilo bilombane. Ino ngikashi isatu ilombane kwikala mu bipungilo byoso na ano etu mafuku.

Mwikeelo wa mufubi

Binobino, twi bya kwalukiila ku mukanda wa 1 Timote 3 bwa kumona ingi

mikeelo ipanundu pa kino kina mwanda, atusangana'shi mikeelo ayitungu, tayikumbane yoso bu ya bakulu. Bitungo bwabo bibofule suunga'shi bipela pee bya mukulu. Anka abitungu kukumbasha byanka. Bishingatshilo bya mu 1 Timote 3:8-13, abitulesha bitungo abitekibwa bwa mufubi :

« *Byabya bino, (abitungu)'shi bafubi bekale bedingye, bashii na mayi abidi, bashii bepaane ku malwa ebungi, suunga kukimba bya kupeta fwalanga mu bulamalama, abalama mwanda ufyame wa lukumiino mu kinangu ki selele, n'abo namu bebatompe kwibedi akupu, bafube, nakusanganiibwa bashaabatopekwa. Bakashi namu beekale ba kineemo, bashii na twipu, basha budimu, balamate ku myanda yoso, mufubi ekale sha mukashi umune, aludika kalolo bana baye na shibo yaye nabeene, mwanda baba babafubu kalolo abakapete kineemo kibuwa na kishima kikata mu lukumiino lwi mu Kilisto Yesu* ».

« *Bafubi bekale bapuwdikye* » kineemo na bu muntu mululame bwakutumika uno mufubo.

« *shiina dimi ibidi* » mufubi mulombeene kwikala'anka na lwalulo lumune ku mwanda, kushi kushituula kwakula saa na saa, bino abifwisha kasabu ku mudimo na tabyalusa ntumbo kwi Efile-Mukulu nya.

« *Shi mwipaane ku malwa* » kino kitungo na kyo kimune bwa mukulu na mufubi.

« *Shina kifulo na fwalanga* » kino kitungo kina muulo ukata bikishe kishe bwa yawa ena bushito bwa kulama bintu.

« *Alama mwanda ufwane wa lukumiinno kinangu ki selele* » Kupatuula kwa kino kitungo takwamba'shi kwi mwanda ifwame nya. Anka kutatuula na kapatupatu na kulesha myanda y'eyendo itale bwina kukumiina. Bikile buwa shi Eyendo dikale dishale na kinangu ki selele. Anka tabibofule kwibikita nya, anka kutambuka kupwidikye aku katundusha kalolo kikudi kondo ke mwishimba.

« *N'abo namu beebatompe kwibedi* » bikile buwa shi bushito bwikale bu mupebwe kapelakapela na'shi mufubi ekale mutompibwe kumpala akumupa angi mashito. Kumpala mulombeene kulesha kalolo kipaso kya kalombasha mufubo awu kamupebwa.

« *bakashi namu, bekale na kineemo* » mufubi mukumbeene kwikala na mufubo ukata wa kukita, anka bibuwa'shi yawa epepi naye ekale muntu a kineemo, shadimbisheena myanda (misuusa bungi kini bibofule kwakula mwanda wa muntu). Ekale na lwishinko na mukumbane, na mulamate mu myanda yoso. Su ta byabya mukashi mukumbeene kulwisha mufubo wa mufubi.

« *Mufubi ekale mulume a mukashi umune aludika kalolo bana baye na shibo yaye* » abilesa dingi kwikala na lwishinko. Bifundwe tabipa bafubi bulungatu,

suunga bashii na bushito bwa kulama bintu, bya bandya kwikala na mwikelo upatakane. Fumu atumbishibwa pee bukalanga na myanda ayilondeena milongo mu kakongye mu myanda yoso na pa bimweneka kwi baaba bapasha.

Bina bukwashi na kutundula'shi kutambuka mu kululama, bwa mufubi, bikile kineemo bwa kupeta nkumo ibuwa mu kakongye. Tatupwile kutaluula kipwandjikisho kya Fidipi na Etienne. Bano bantu babidi, baabadi basangulwe bwa kutumika na bangi bwa kwabila bintu, ta babaadi bayimeene nka pa wawa mufubo nya. Babaadi bepaane ku ingi mifubo na atumono myabi ibaadi ifwishe Fidipi ku Sesale na dingi bwa bu kamoni bwa Etienne. Ino mifubo ibaadi kumpala kwa uno mufubo wa kwaba bintu; na uno mufubo ubaadi upeeshe Fumu kineemo kikata. Binobino, Fumu akimbuula bafubi balamate bwa kutumika munkatshi a tukongye twaye.

Kino kipindji kya kano kakanda : 1 3. Kyaluulwe mu Kisongye mu Kabinda, mweshi wa kitema (10) mu kipwa kya 2025 kwi bakwetu bano : **Arthur NYINDU ASSANI**, na **Esther KIMANKINDA YANGONGO**.